

姚秦三藏鳩摩羅什 譯

# 佛說仁王護國般若波羅蜜經

財團法人佛陀教育基金會印贈

佛說仁王護國般若波羅蜜經目次

卷上

序品第一 ..... 7

觀空品第二 ..... 12

菩薩教化品第三 ..... 18

二諦品第四 ..... 38

卷下

護國品第五 ..... 45

散華品第六 ..... 51

受持品第七 ..... 54

囑累品第八 ..... 71

## 爐香讚

爐香乍爇 法界蒙熏 諸佛海會悉遙聞 隨處結  
祥雲 誠意方殷 諸佛現全身

南無香雲蓋菩薩摩訶薩（三稱）

南無本師釋迦牟尼佛（三稱）

## 淨身業真言

唵。修哆唎。修哆唎。修摩唎。修摩唎。娑婆訶。

## 淨口業真言

唵。修唎修唎。摩訶修唎。修修唎。娑婆訶。

## 淨意業真言

唵。嚩日囉怛訶賀斛。

### 淨三業真言

唵。娑嚩婆嚩秫馱。娑嚩達摩娑嚩。婆嚩秫度憾。

### 安土地真言

南無三滿哆。沒馱喃。唵。度嚕度嚕。地尾。娑婆訶。

### 普供養真言

唵。誡誡曩。三婆嚩。鞞日囉斛。

### 奉請五方 金剛菩薩摩訶薩

奉請東方 金剛手菩薩

奉請南方 金剛寶菩薩

奉請西方 金剛利菩薩

奉請北方 金剛藥叉菩薩

奉請中方 金剛波羅蜜多菩薩

奉請 護國仁王十地菩薩摩訶薩

奉請轉輪天 護國仁王歡喜地菩薩

奉請忉利天 護國仁王離垢地菩薩

奉請夜摩天 護國仁王發光地菩薩

奉請覩史天 護國仁王焰慧地菩薩

奉請化樂天 護國仁王難勝地菩薩

奉請自在天 護國仁王現前地菩薩

奉請初禪天	護國仁王遠行地菩薩
奉請二禪天	護國仁王不動地菩薩
奉請三禪天	護國仁王善慧地菩薩
奉請四禪天	護國仁王法雲地菩薩

開經偈

無上甚深微妙法	百千萬劫難遭遇
我今見聞得受持	願解如來真實義

# 佛說仁王護國般若波羅蜜經卷上

姚秦三藏鳩摩羅什譯

## 序品第一

如是我聞，一時，佛住王舍城耆闍崛山中，與大比丘衆八百萬億，學無學皆阿羅漢，有爲功德無爲功德，無學十智、有學八智、有學六智，三根十六心行，法假虛實觀、受假虛實觀、名假虛實觀，三空觀門，四諦、十二緣，無量功德皆成就。復有八百萬億大仙緣覺，非斷非常，四諦、十二緣皆成就。復有九

百萬億菩薩摩訶薩，皆阿羅漢實智功德、方便智功德，行獨大乘，四眼、五通、三達、十力、四無量心、四辯、四攝、金剛滅定，一切功德皆成就。復有千萬億五戒賢者，皆行阿羅漢、十地，迴向五分法身具足，無量功德皆成就。復有十千五戒清信女，皆行阿羅漢、十地皆成就，始生功德、住生功德、終生功德，三十生功德皆成就。復有十億七賢居士，德行具足：十二品、十一切入、八除入、八解脫、三慧、十六諦、四諦、四三三二品觀，得九十忍，一切功德皆成就。復有萬萬億九梵、三淨、三光、三梵、五喜樂天，天定功德定味，常樂神通，十



八生處功德皆成就。復有億億六欲諸天子，十善果報神通功德皆成就。復有十六大國王，各各有一萬二萬乃至十萬眷屬，五戒、十善、三歸功德，清信行具足。復有五道一切衆生。復有他方不可量衆。復有變十方淨土，現百億高座，化百億須彌寶華，各各坐前華上，復有無量化佛。有無量菩薩比丘八部大衆，各各坐寶蓮華，華上皆有無量國土，一一國土，佛及大衆如今無異。一一國土中，一一佛及大衆，各各說般若波羅蜜。他方大衆及化衆，此三界中大衆，十二大衆，皆來集會，坐九劫蓮華座。其會方廣九百五十里，大衆僉然而坐。

爾時，十號三明大滅諦金剛智釋迦牟尼佛，初年月八日方坐十地，入大寂室三昧，思緣放大光明照三界中。復於頂上出千寶蓮華，其華上至非想非非想天，光亦復爾，乃至他方恒河沙諸佛國土。時無色界雨無量變大香華香，如車輪華，如須彌山王，如雲而下；十八梵天王雨百變異色華；六欲諸天雨無量色華。其佛座前自然生九百萬億劫（丹本作級）華，上至非想非非想天，是時世界其地六種震動。

爾時，諸大衆俱共僉然生疑，各相謂言：「四無所畏、十八不共法、五眼法身大覺世尊，前已爲我等大衆，二十九年說摩訶

般若波羅蜜、金剛般若波羅蜜、天王問般若波羅蜜、光讚般若波羅蜜。今日如來放大光明，斯作何事？」時十六大國王中，舍衛國主波斯匿王名曰月光，德行十地，六度、三十七品、四不壞淨，行摩訶衍化，次第問居士寶蓋法淨名等八百人；復問須菩提、舍利弗等五千人；復問彌勒、師子吼等十千人，無能答者。

時波斯匿王即以神力作八萬種音樂，十八梵、六欲諸天亦作八萬種音樂，聲動三千乃至十方恒河沙佛土，有緣斯現。彼他方佛國中南方法才菩薩共五百萬億大衆，俱來入此大會；東方寶

柱菩薩共九百萬億大衆，俱來入此大會；北方虛空性菩薩共百千萬億大衆，俱來入此大會；西方善住菩薩共十恒河沙大衆，俱來入此大會。六方亦復如是，作樂亦然，亦復共作無量音樂，覺悟如來。佛即知時得衆生根，即從定起，方坐蓮華師子座上，如金剛山王。大衆歡喜，各各現無量神通，地及虛空大衆而住。

## 觀空品第二

爾時，佛告大衆：「知十六大國王意欲問護國土因緣。吾今先爲諸菩薩，說護佛果因緣、護十地行因緣。諦聽，諦聽！善思

念之，如法修行！」時波斯匿王言：「善！大事因緣故！」即散百億種色華，變成百億寶帳，蓋諸大眾。

爾時，大王復起作禮，白佛言：「世尊！一切菩薩云何護佛果？云何護十地行因緣？」佛言：「菩薩化四生，不觀色如，受想行識如，衆生我人常樂我淨如，知見壽者如，菩薩如，六度四攝一切行如，二諦如。是故一切法性真實空，不來不去，無生無滅，同真際，等法性，無二無別如虛空。是故陰入界無我，無所有相，是爲菩薩行化十地般若波羅蜜。」

白佛言：「若諸法爾者，菩薩護化衆生，爲化衆生耶？」「大王！

法性色受想行識、常樂我淨，不住色，不住非色，不住非非色，乃至受想行識亦不住非非住。何以故？非色如，非非色如。世諦故、三假故，名見衆生，一切生性實故，乃至諸佛、三乘、七賢、八聖亦名見，六十二見亦名見。大王！若以名名見一切法，乃至諸佛三乘四生者，非非見一切法也。」

白佛言：「般若波羅蜜有法非非法，摩訶衍云何照？」

「大王！摩訶衍見非非法，法若法非非法，是名非非法空。法性空，色、受、想、行、識空，十二入、十八界空，六大法空，四諦、十二緣空。是法即生即住即滅，即有即空，剎那剎那亦

如是，法生法住法滅。何以故？九十剎那爲一念，一念中一剎那經九百生滅，乃至色一切法亦如是。以般若波羅蜜空故，不見緣，不見諦，乃至一切法空，內空、外空、內外空、有爲空、無爲空、無始空、性空、第一義空、般若波羅蜜空、因空、佛果空、空空故空。但法集故有，受集故有，名集故有，因集故有，果集故有，十行故有，佛果故有，乃至六道一切有。善男子！若有菩薩見法衆生我人知見者，斯人行世間，不異於世間。於諸法而不動、不到、不滅，無相、無無相，一相法亦如也，諸佛法僧亦如也，是即初地一念心，具足八萬四千般若波

羅蜜，即載名摩訶衍，即滅爲金剛，亦名定，亦名一切行。如光讚般若波羅蜜中說。」

「大王！是經名味句，百佛千佛百千萬佛說名味句。於恒河沙三千大千國土中，成無量七寶，施三千大千國中衆生，皆得七賢四果，不如於此經中起一念信，何況解一句者！句非句非非句故，般若非句，句非般若，般若亦非菩薩。何以故？十地三十生空故，始生、住生、終生不可得，地地中三生空故，亦非薩婆若，非摩訶衍空故。」

「大王！若菩薩見境、見智、見說、見受者，非聖見也，倒想



見法，凡夫人也。見三界者，衆生果報之名也。六識起無量欲無窮，名爲欲界藏空；或色所起業果，名爲色界藏空；或心所起業果，名無色界藏空。三界空，三界根本無明藏亦空，三地九生滅，前三界中餘無明習果報空。金剛菩薩得理盡三昧故，或果生滅空，有果空、因空故空。薩婆若亦空，滅果空，或前已空故，佛得三無爲果。智緣滅，非智緣滅，虛空薩婆若果空也。善男子！若有修習聽說，無聽無說，如虛空，法同法性，聽同說同，一切法皆如也。大王！菩薩修護佛果爲若此。護般若波羅蜜者爲護薩婆若，十力、十八不共法、五眼、五分法身、

四無量心，一切功德果爲若此。」

佛說法時，無量人天衆得法眼淨，性地、信地有百千人，皆得大空菩薩大行。

### 菩薩教化品第三

白佛言：「世尊！護十地行菩薩云何行可行？云何行化衆生？以何相衆生可化？」佛言：「大王！五忍是菩薩法：伏忍上中下、信忍上中下、順忍上中下、無生忍上中下、寂滅忍上中下，名爲諸佛菩薩修般若波羅蜜。」

「善男子！初發想信，恒河沙衆生修行伏忍，於三寶中生習種性十心：信心、精進心、念心、慧心、定心、施心、戒心、護心、願心、迴向心。是爲菩薩能少分化衆生，已超過二乘一切善地。一切諸佛菩薩長養十心爲聖胎也。」

「次第起乾慧性種性有十心，所謂四意止，身受心法，不淨、苦、無常、無我也；三意止；三善根，慈、施、慧也。三意止，所謂三世，過去因忍、現在因果忍、未來果忍。是菩薩亦能化一切衆生，已能過我人知見衆生等想，及外道倒想所不能壞。」

「復有十道種性地，所謂觀色識想受行，得戒忍、知見忍、定

忍、慧忍、解脫忍；觀三界因果，空忍、無願忍、無想忍；觀二諦虛實，一切法無常，名無常忍；一切法空，得無生忍。是菩薩十堅心作轉輪王，亦能化四天下，生一切衆生善根。」

「又信忍菩薩所謂善達明，中行者斷三界色煩惱縛，能化百佛千佛萬佛國中，現百身千身萬身，神通無量功德，常以十五心爲首：四攝法、四無量心、四弘願、三解脫門。是菩薩從善地至於薩婆若，以此十五心爲一切行根本種子。」

「又順忍菩薩所謂見勝現法，能斷三界心等煩惱縛故，現一身於十方佛國中無量不可說神通化衆生。」

「又無生忍菩薩所謂遠不動觀慧，亦斷三界心色等煩惱習故，現不可說不可說功德神通。」

「復次，寂滅忍，佛與菩薩同用此忍入金剛三昧。下忍中行名爲菩薩，上忍中行名爲薩婆若，共觀第一義諦，斷三界心習，無明盡相爲金剛，盡相無相爲薩婆若，超度世諦第一義諦之外，爲第十一地薩婆若。覺非有非無，湛然清淨，常住不變，同眞際等法性，無緣大悲，教化一切衆生，乘薩婆若乘來化三界。」

「善男子！一切衆生煩惱不出三界藏，一切衆生果報二十二根

不出三界，諸佛應化法身亦不出三界。三界外無衆生，佛何所化？是故我言，三界外別有一衆生界藏者，外道大有經中說，非七佛之所說。」

「大王！我常語：一切衆生斷三界煩惱果報盡者名爲佛；自性清淨名覺薩婆若性。衆生本業是諸佛菩薩本業，本所修行，五忍中十四忍具足。」

白佛言：「云何菩薩本業清淨化衆生？」佛言：「從一地乃至後一地，自所行處及佛行處，一切知見故。本業者，若菩薩住百佛國中，作閻浮四天王，修百法門，二諦平等心化一切衆生；

若菩薩住千佛國中，作忉利天王，修千法門，十善道化一切衆生；若菩薩住十萬佛國中，作炎天王，修十萬法門，四禪定化一切衆生；若菩薩住百億佛國中，作兜率天王，修百億法門，行道品化一切衆生；若菩薩住千億佛國中，作化樂天王，修千億法門，二諦四諦八諦化一切衆生；若菩薩住十萬億佛國中，作他化天王，修十萬億法門，十二因緣智化一切衆生；若菩薩住百萬億佛國中，作初禪王，修百萬億法門，方便智、願智化一切衆生；若菩薩住百萬微塵數佛國中，作二禪梵王，修百萬微塵數法門，雙照方便神通智化一切衆生；若菩薩住百萬億阿

僧祇微塵數佛國中，作三禪大梵王，修百萬億阿僧祇微塵數法門，以四無礙智化一切衆生；若菩薩住不可說不可說佛國中，作第四禪大靜天王三界主，修不可說不可說法門，得理盡三昧，同佛行處，盡三界原，教化一切衆生，如佛境界。是故一切菩薩本業化行清淨，若十方諸如來亦修是業，登薩婆若果，作三界王，化一切無量衆生。」

爾時，百萬億恒河沙大衆，各從座起，散無量不可思議華，燒無量不可思議香，供養釋迦牟尼佛及無量大菩薩，合掌聽波斯匿王說般若波羅蜜，今於佛前以偈歎曰：



習種銅輪二天下，	中下品善粟散王，	十善菩薩發大心，	佛衆法海三寶藏，	三賢十聖忍中行，	五忍功德妙法門，	時六天人出家道，	八辯洪音為衆說，	「世尊導師金剛體，
銀輪二天性種性，	上品十善鐵輪王，	長別三界苦輪海，	無量功德攝在中。	唯佛一人能盡原，	十四正士能諦了，	成比丘衆菩薩行，	時衆得道百億萬。	心行寂滅轉法輪，

道種堅德轉輪王，

七寶金光四天下。

伏忍聖胎三十人，

十信十止十堅心，

三世諸佛於中行，

無不由此伏忍生。

一切菩薩行本原，

是故發心信心難，

若得信心必不退，

進入無生初地道，

教化衆生覺中行，

是名菩薩初發心。

善覺菩薩四天王，

雙照二諦平等道，

權化衆生遊百國，

始登一乘無相道。

入理般若名為住，

住生德行名為地，

初住一心足德行，  
於第一義而不動。  
離達開土忉利王，  
現形六道千國土，  
無緣無相第三諦，  
無死無生無一照。  
明慧空照炎天王，  
應形萬國導群生，  
忍心無二三諦中，  
出有入無變化生。  
善覺離明三道人，  
能滅三界色煩惱，  
還觀三界身口色，  
法性第一無遺照。  
炎慧妙光大精進，  
兜率天王遊億國，  
實智緣寂方便道，  
達無生照空有了。

勝慧三諦自達明，

化樂天王百億國，

空空諦觀無二相，

變化六道入無間。

法現開士自在王，

無一無照達理空，

三諦現前大智光，

照千億土教一切。

焰勝法現無相定，

能洗三界迷心惑，

空慧寂然無緣觀，

還觀心空無量報。

遠達無生初禪王，

常萬億土教衆生，

未度報身一生在，

進入等觀法流地。

始入無緣金剛忍，

三界報形永不受，

觀第二義無二照，  
二十一生空寂行。  
三界愛習順道定，  
遠達正士獨諦了，  
等觀菩薩二禪王，  
變生法身無量光。  
入百恒土化一切，  
圓照三世恒劫事，  
返照樂虛無盡原，  
於第三諦常寂然。  
慧光開土三禪王，  
能於千恒一時現，  
常在無為空寂行，  
恒沙佛藏一念了。  
灌頂菩薩四禪王，  
於億恒土化群生，  
始入金剛一切了，  
二十九生永已度。

寂滅忍中下忍觀，

一轉妙覺常湛然，

等慧灌頂三品士，

除前餘習無明緣。

無明習相故煩惱，

二諦理窮一切盡，

圓智無相三界王，

三十生盡等大覺。

大寂無為金剛藏，

一切報盡無極悲，

第一義諦常安隱，

窮原盡性妙智存。

三賢十聖住果報，

唯佛一人居淨土，

一切衆生暫住報，

登金剛原居淨土。

如來三業德無極，

我今月光禮三寶，

法王無上人中樹，  
覆蓋大衆無量光。

□常說法非無義，  
心智寂滅無緣照，

人中師子為衆說，  
大衆歡喜散金華。

百億萬土六大動，  
含生之類受妙報，

天尊快說十四王，  
是故我今略歎佛。」

時諸大衆聞月光王歎十四王無量功德藏，得大法利，即於坐中，有十恒河沙天王、十恒河沙梵王、十恒河沙鬼神王，乃至三趣得無生法忍；八部阿須輪王現轉鬼身，天上受道，三生入正位者，或四生、五生乃至十生得入正位，證聖人性，得一切

無量報。

佛告諸得道果實天衆：「善男子！是月光王已於過去十千劫中，龍光王佛法中，爲四住開士，我爲八住菩薩。今於我前大師子吼。如是，如是！如汝所言，得真義說，不可思議，不可度量，唯佛與佛，乃知斯事。」

「善男子！其所說十四般若波羅蜜、三忍、地地上中下三忍，一切行藏、一切佛藏，不可思議。何以故？一切諸佛是中生，是中滅，是中化，無生無滅無化，無自無他，第一無二，非化非不化，非相非無相，無來無去，如虛空故。一切衆生無



生無滅，無縛解，非因非果，非不因果，煩惱我人知見受者、我所者，一切苦受行空故。一切法集，幻化五陰，無合無散，法同法性，寂然空故。法境界空，空無相，不轉不顛倒，不順幻化。無三寶，無聖人，無六道，如虛空故。般若無知無見，不行不緣，不因不受，不得一切照相故，行道斯行道相如虛空故。法相如是，何可有心得、無心得？是以般若功德，不可衆生中行而行，不可五陰法中行而行，不可境中行而行，不可解中行而行。是故般若不可思議，而一切諸佛菩薩於中行，故亦不可思議。一切諸如來於幻化無住法中化，亦不可思議。」

「善男子！此功德藏，假使無量恒河沙第十三灌頂開士說是功德，百千億分中，如王所說，如海一滄。我今略述分義功德，有大利益一切衆生，亦爲過去來今無量諸如來之所述可。三賢十聖讚歎無量，是月光王分義功德。」

「善男子！是十四法門，三世一切衆生、一切三乘、一切諸佛之所修集，未來諸佛亦復如是。若一切諸佛菩薩不由此門得薩婆若者，無有是處。何以故？一切佛及菩薩無異路故。是故一切諸善男子，若有人聞諸忍法門：信忍、止忍、堅忍、善覺忍、離達忍、明慧忍、焰慧忍、勝慧忍、法現忍、遠達忍、等覺忍、

慧光忍、灌頂忍、圓覺忍者，是人超過百劫千劫無量恒河沙生  
生苦難，入此法門，現身得報。」

時諸衆中有十億，同名虛空藏海菩薩，歡喜法樂，各各散華於  
虛空中，變成無量華臺，上有無量大衆，說十四正行。十八梵、  
六欲天王，亦散寶華，各坐虛空臺上，說十四正行，受持讀誦，  
解其義理。無量諸鬼神，現身修行般若波羅蜜。

佛告大王：「汝先言：『云何衆生相可化？』若以幻化身見幻化  
者，是菩薩眞行化衆生。衆生識初一念識異木石，生得善、生  
得惡，惡爲無量惡識本，善爲無量善識本。初一念金剛終一念，

於中生不可說不可說識，成衆生色心是衆生根本。色名色蓋，心名識蓋、想蓋、受蓋、行蓋。蓋者陰覆爲用，身名積聚。」

「大王！此一色法生無量色：眼所得爲色，耳所得爲聲，鼻所得爲香，舌得爲味，身得爲觸，堅持名地，水名潤，火名熱，輕動名風；生五識處名根。如是一色一心，有不可思議色心。」

「大王！凡夫六識麤故，得假名青黃方圓等無量假色法；聖人六識淨故，得實法色香味觸一切實色法。衆生者，世諦之名也。若有若無，但生衆生憶念，名爲世諦。世諦假誑幻化故有，乃至六道幻化，衆生見幻化，幻化見幻化，婆羅門、刹利、毘舍、

首陀，神我等色心，名爲幻諦。幻諦法無，佛未出世前，無名字，無義名；幻法幻化，無名字，無體相，無三界名字，無善惡果報六道名字。大王！是故佛佛出現於世，爲衆生故，說作三界六道名字，是名無量名字。如空法、四大法、心法、色法。相續假法，非一非異，一亦不續，異亦不續，非一非異故，名相續諦。相待假法，一切名相待，亦名不定相待，如五色等法，有無一切等法。一切法皆緣成，假成衆生，俱時因果，異時因果，三世善惡，一切幻化，是幻諦衆生。」

「大王！若菩薩如上所見衆生幻化，皆是假誑，如空中華，十

住菩薩諸佛五眼，如幻諦而見，菩薩化衆生，爲若此。」

說此法時，有無量天子及諸大衆得伏忍者，得空無生忍，乃至一地十地不可說德行。

## 二諦品第四

爾時波斯匿王言：「第一義諦中有世諦不？若言無者，智不應二；若言有者，智不應一。一二之義，其事云何？」

佛告大王：「汝於過去七佛，已問一義二義。汝今無聽，我今無說。無聽無說，即爲一義二義故。諦聽，諦聽！善思念之，

如法修行。七佛偈如是：

「無相第一義，	無自無他作，	因緣本自有，	無自無他作。
法性本無性，	第一義空如，	諸有本有法，	三假集假有。
無無諦實無，	寂滅第一空，	諸法因緣有，	有無義如是。
有無本自二，	譬若牛二角，	照解見無二，	二諦常不即。
解心見不二，	求二不可得，	非謂二諦一，	非二何可得。
於解常自一，	於諦常自二，	通達此無二，	真入第一義。
世諦幻化起，	譬如虛空華，	如影二手無，	因緣故誑有。
幻化見幻化，	衆生名幻諦，	幻師見幻法，	諦實則皆無。

名為諸佛觀，菩薩觀亦然。」

「大王！菩薩摩訶薩於第一義中，常照二諦化衆生。佛及衆生一而無二。何以故？以衆生空故得置菩提空，以菩提空故得置衆生空。以一切法空故空空。何以故？般若無相，二諦虛空，般若空，從無明乃至薩婆若，無自相、無他相故，五眼成就時見無所見，行亦不受，不行亦不受，非行非不行亦不受，乃至一切法亦不受。菩薩未成佛時，以菩提爲煩惱，菩薩成佛時，以煩惱爲菩提，何以故？於第一義而不二故，諸佛如來乃至一切法如故。」



白佛言：「云何十方諸如來、一切菩薩不離文字而行諸法相？」

「大王！法輪者：法本如、重誦如、受記如、不誦偈如、無問而自說如、戒經如、譬喻如、法界如、本事如、方廣如、未曾有如、論議如，是名味句音聲果文字記句一切如。若取文字者，不行空也。」

「大王！如如文字修諸佛智母，一切衆生性根本智母，即爲薩婆若體。諸佛未成佛，以當佛爲智母，未得爲性，已得爲薩婆若。三乘般若，不生不滅，自性常住，一切衆生，以此爲覺性故。若菩薩無受無文字，離文字，非非文字，修無修爲修文字

者，得般若眞性般若波羅蜜。大王！若菩薩護佛、護化衆生、護十地行，爲若此。」

白佛言：「無量品衆生，根亦無量，行亦無量。法門爲一爲二，爲無量耶？」

「大王！一切法觀門，非一非二，乃有無量一切法，亦非有相，非非無相。若菩薩見衆生，見一見二，即不見一不見二，一二者，第一義諦也。」

「大王！若有若無者，即世諦也。以三諦攝一切法，空諦、色諦、心諦故，我說一切法不出三諦。我人知見五受陰空，乃至

一切法空，衆生品品根行不同故，非一非二法門。」

「大王！七佛說摩訶般若波羅蜜，我今說般若波羅蜜，無二無別。汝等大衆，應當受持讀誦解說。是經功德，有無量不可說不可說諸佛，一一佛教化無量不可說衆生，一一衆生皆得成佛；是佛復教化無量不可說衆生，皆得成佛；是上三佛說般若波羅蜜經八萬億偈；於一偈中復分爲千分；於一分中說一分句義不可窮盡，況復於此經中起一念信！是諸衆生超百劫千劫十地等功德，何況受持讀誦解說者功德，即十方諸佛等無有異。當知是人即是如來，得佛不久。」

時諸大衆聞說是經，十億人得三空忍；百萬億人得大空忍、十地性。

「大王！此經名爲仁王問般若波羅蜜經。汝等受持般若波羅蜜經，是經復有無量功德，名爲護國土功德，亦名一切國王法藥服行無不大用護舍宅功德，亦護一切衆生身。即此般若波羅蜜，是護國土，如城塹牆壁刀劍鉞楯，汝應受持般若波羅蜜，亦復如是。」

佛說仁王般若波羅蜜經卷上

# 佛說仁王般若波羅蜜經卷下

姚秦三藏鳩摩羅什譯

## 護國品第五

爾時，佛告大王：「汝等善聽，吾今正說護國土法用，汝當受持般若波羅蜜。當國土欲亂，破壞劫燒，賊來破國時，當請百佛像、百菩薩像、百羅漢像，百比丘衆、四大衆、七衆共聽，請百法師講般若波羅蜜。百師子吼高座前燃百燈，燒百和香，百種色花，以用供養三寶，三衣什物供養法師，小飯中食亦復

以時。大王！一日二時講讀此經，汝國土中有百部鬼神，是一部復有百部，樂聞是經，此諸鬼神護汝國土。」

「大王！國土亂時，先鬼神亂，鬼神亂故萬民亂，賊來劫國，百姓亡喪。臣君、太子、王子、百官共生是非，天地怪異，二十八宿、星道、日月失時失度，多有賊起。」

「大王！若火難、水難、風難、一切諸難，亦應講讀此經，法用如上說。」

「大王！不但護國，亦有護福，求富貴官位七寶如意行來，求男女，求慧解名聞，求六天果報，人中九品果樂，亦講此經，

法用如上說。」

「大王！不但護福，亦護衆難，若疾病苦難，杻械枷鎖檢繫其身，破四重罪，作五逆因，作八難罪，行六道事，一切無量苦難，亦講此經，法用如上說。」

「大王！昔日有王釋提桓因，爲頂生王來上天欲滅其國。時帝釋天王即如七佛法用，敷百高座，請百法師，講般若波羅蜜。頂生即退，如滅罪經中說。」

「大王！昔有天羅國王，有一太子欲登王位，一名班足。太子爲外道羅陀師受教，應取千王頭以祭家神。自登其位，已得九

百九十九王，少一王。即北行萬里，即得一王，名普明王。其普明王白班足王言：『願聽一日飯食沙門，頂禮三寶。』其班足王許之一日。時普明王即依過去七佛法，請百法師，敷百高座，一日二時講般若波羅蜜八千億偈竟，其第一法師爲普明王而說偈言：

「劫燒終訖，	乾坤洞燃。	須彌巨海，	都為灰燭，
天龍福盡，	於中彫喪。	二儀尚殞，	國有何常。
生老病死，	輪轉無際，	事與願違，	憂悲為害。
欲深禍重，	瘡疣無外，	三界皆苦，	國有何賴。



有本自無，因緣成諸，盛者必衰，實者必虛。  
衆生蠢蠢，都如幻居，聲響俱空，國土亦如。  
識神無形，假乘四馳，無明寶象，以為樂車。  
形無常主，神無常家，形神尚離，豈有國耶！」

「爾時，法師說此偈已，時普明王眷屬得法眼空，王自證虛空等定，聞法悟解。還至天羅國班足王所衆中，即告九百九十九王言：『就命時到，人人皆應誦過去七佛《仁王問般若波羅蜜經》中偈句。』時班足王問諸王言：『皆誦何法？』時普明王即以上偈答王。王聞是法，得空三昧；九百九十九王亦聞法已，

皆證三空門定。時班足王極大歡喜，告諸王言：『我爲外道邪師所誤，非君等過。汝可還本國，各各請法師講般若波羅蜜名味句。』時班足王以國付弟，出家爲道，證無生法忍，如十王地中說。五千國王常誦是經，現世生報。」

「大王！十六大國王修護國之法，法應如是，汝當奉持。天上人中六道衆生，皆應受持七佛名味句。未來世中有無量小國王欲護國土，亦復爾者，應請法師說般若波羅蜜。」

爾時，釋迦牟尼佛說般若波羅蜜時，衆中五百億人得入初地，復有六欲諸天子八十萬人得性空地，復有十八梵王得無生忍、

得無生法樂忍，復有先以學菩薩者，證一地、二地、三地乃至十地，復有八部阿須輪王得十二昧門、得三三昧門，得轉鬼身，天上正受，在此會者皆得自性信乃至無量空信。吾今略說天等功德不可具盡。

## 散華品第六

爾時，十六大國王聞佛說十萬億偈般若波羅蜜，歡喜無量，即散百萬億莖華，於虛空中變爲一座，十方諸佛共坐此座，說般若波羅蜜。無量大衆共坐一座，持金羅華，散釋迦牟尼佛上，

成萬輪華，蓋大衆上；復散八萬四千般若波羅蜜華於虛空中，變成白雲臺，臺中光明王佛，共無量衆，說般若波羅蜜。臺中大衆持雷吼華，散釋迦牟尼佛及諸大衆；復散妙覺華於虛空中，變作金剛城。城中師子吼王佛共十方佛、大菩薩論第一義諦。時城中菩薩，持光明華，散釋迦牟尼佛上，成一華臺，臺中十方佛。諸天散天華，於釋迦牟尼佛上虛空中成紫雲蓋，覆三千大千世界，蓋中天人散恒河沙華，如雲而下。時諸國王，散華供已，願過去佛、現在佛、未來佛常說般若波羅蜜，願一切受持者，比丘、比丘尼、信男、信女，所求如意，常行般若

波羅蜜。

佛告大王：「如是，如是！如王所說。般若波羅蜜應說應受，是諸佛母、諸菩薩母，神通生處。」

時，佛爲王現五不思議神變：一華入無量華，無量華入一華；一佛土入無量佛土，無量佛土入一佛土；無量佛土入一毛孔土，一毛孔土入無量毛孔土；無量須彌、無量大海入芥子中；一佛身入無量衆生身，無量衆生身入一佛身、入六道身、入地水火風身，佛身不可思議，衆生身不可思議，世界不可思議。佛現神足時，十方諸天人得佛華三昧，十恒河沙菩薩現身成

佛，三恒河沙八部王成菩薩道，十千女人現身得神通三昧。

「善男子！是般若波羅蜜有三世利益，過去已說，現在今說，未來當說。諦聽，諦聽！善思念之，如法修行。」

## 受持品第七

爾時，月光心念口言：「見釋迦牟尼佛現無量神力，亦見千華臺上寶滿佛，是一切佛化身主。復見千華葉世界上佛，其中諸佛各各說般若波羅蜜。」白佛言：「如是無量般若波羅蜜，不可說不可解，不可以識識。云何諸善男子，於是經中明了覺解，

如法爲一切衆生開空法道？」

大牟尼言：「有修行十二觀門諸善男子，爲大法王，從習忍至金剛頂，皆爲法師，依持建立。汝等大衆，應如佛供養而供養之，應持百萬億天華天香而以奉上。」

「善男子！其法師者是習種性菩薩，若在家婆差、憂婆差，若出家比丘、比丘尼，修行十善，自觀己身，地、水、火、風、空、識分分不淨；復觀十四根，所謂五情、五受、男、女、意、命等，有無量罪過故，即發無上菩提心，常修三界一切念念皆不淨，故得不淨忍觀門。住在佛家，修六和敬，所謂三業同戒、

同見、同學，行八萬四千波羅蜜道。」

「善男子！習忍以前行十善菩薩，有退有進，譬如輕毛，隨風東西。是諸菩薩亦復如是，雖以十千劫行十正道，發三菩提心，乃當入習忍位，亦常學三伏忍法，而不可名字，是不定人。是定人者，入生空位，聖人性故，必不起五逆、六重、二十八輕。佛法經書作返逆罪，言非佛說，無有是處。能以一阿僧祇劫，修伏道忍行，始得入僧伽陀位。」

「復次，性種性行十慧觀，滅十顛倒，及我人知見分分假偽，但有名，但有受，但有法，不可得，無定相，無自他相故。修



護空觀，亦觀亦行百萬波羅蜜，念念不去心，以二阿僧祇劫行正道法，住波羅陀位。」

「復次，道種性住堅忍中，觀一切法無生、無住、無滅，所謂五受、三界、二諦，無自他相，如實性不可得故；而常入第一義諦，心心寂滅而受生三界。何以故？業習果報未壞盡，故順道生。復以二阿僧祇劫，修八萬億波羅蜜，當得平等聖人地故，住阿毘跋致正位。」

「復次，善覺摩訶薩，住平等忍，修行四攝，念念不去，心入無相，捨滅三界貪煩惱，於第一義諦而不二，爲法性無爲，緣

理而滅一切相故，爲智緣滅無相無爲。住初忍時，未來無量生死不由智緣而滅故，非智緣滅，無相無爲，無自他相，無無相故，無量方便皆現前。觀實相方便者，於第一義諦，不沈不出，不轉不顛倒。遍學方便者，非證非不證而一切學。迴向方便者，非住果非不住果而向薩婆若。魔自在方便者，於非道而行佛道，四魔所不動。一乘方便者，於不二相，通達衆生一切行故。變化方便者，以願力自在生一切淨佛國土。如是善男子！是初覺智，於有無相而不二，是實知照功用；不證不沈，不出不到，是方便觀。譬如水之與波，不一不異，乃至一切行，波羅蜜、

禪定、陀羅尼，不一不二故，而一行成就。以四阿僧祇劫行故，入此功德藏門。無三界業習生故，畢故不造新，以願力故，變化生一切淨土。常修捨觀故，登鳩摩羅伽位，以四大寶藏常授與人。」

「復次，德慧菩薩，以四無量心滅三有瞋等煩惱，住中忍中，行一切功德故。以五阿僧祇劫行大慈觀，心心常現在前，入無相闍陀波羅位，化一切衆生。」

「復次，明慧道人，常以無相忍中行三明觀，知三世法無來無去無住處，心心寂滅，盡三界癡煩惱，得三明一切功德觀故，

常以六阿僧祇劫，集無量明波羅蜜故，入伽羅陀位，無相行受持一切法。」

「復次，爾焰聖覺達菩薩，修行順法忍，逆五見流，集無量功德，住須陀洹位。常以天眼、天耳、宿命、他心、身通達，念中滅三界一切見，亦以七阿僧祇劫行五神通，恒河沙波羅蜜常不離心。」

「復次，勝達菩薩，於順道忍，以四無畏，觀那由他諦內道論、外道論、藥方、工巧、呪術故，我是一切智人；滅三界疑等煩惱故，我相已盡；知地地有所出，故名出道；有所不出，故名

障道；逆三界疑。修習無量功德故，即入斯陀含位。復集行八阿僧祇劫中行諸陀羅尼門故，常行無畏觀不去心。」

「復次，常現真實住順忍中，作中道觀，盡三界集因集業一切煩惱故，觀非有非無、一相無相而無二故，證阿那含位。復於九阿僧祇劫，集照明中道故，樂力生一切佛國土。」

「復次，玄達菩薩，十阿僧祇劫中，修無生忍，法樂忍者，名為縛忍。順一切道生而一心忍中滅三界習因業果，住後身中，無量功德皆成就。無生智、盡智、五分法身皆滿足，住第十地阿羅漢梵天位，常行三空門，觀百千萬三昧，具足弘化法藏。」

「復次，等覺者，住無生忍中，觀心心寂滅而無相相、無身身、無知知，而用心乘於群方之方，擔怕住於無住之住。在有常修空，處空常萬化，雙照一切法故，知是處非是處，乃至一切智十力觀故，而登摩訶羅伽位，化一切國土衆生，千阿僧祇劫行十力法，心心相應，常入見佛三昧。」

「復次，慧光神變者，住上上無生忍，滅心心相。法眼見一切法，淨三眼色空見。以大願力常生一切淨土。萬阿僧祇劫，集無量佛光三昧，而能現百萬恒河沙諸佛神力。住婆伽梵位，亦常入佛華三昧。」

「復次，觀佛菩薩，住寂滅忍者，從始發心至今經百萬阿僧祇劫，修百萬阿僧祇功德故，登一切法解脫，住金剛臺。」

「善男子！從習忍至頂三昧，皆名爲伏一切煩惱。而無相信，滅一切煩惱，生解脫智；照第一義諦，不名爲見。所謂見者是薩婆若。是故我從昔以來，常說唯佛所知見覺。頂三昧以下至於習忍，所不知不見不覺，唯佛頓解，不名爲信。漸漸伏者，慧雖起滅，以能無生無滅，此心若滅則累無不滅，無生無滅。入理盡金剛三昧，同眞際等法性，而未能等無等等。譬如有人，登大高臺，下觀一切，無不斯了。住理盡三昧，亦復如是。常

修一切行滿功德藏，入婆伽度位，亦復常住佛慧三昧。」

「善男子！如是諸菩薩，皆能一切十方諸如來國土中化衆生，正說正義，受持讀誦，解達實相，如我今日等無有異。」

佛告波斯匿王：「我當滅度後，法欲滅時，受持是般若波羅蜜，大作佛事。一切國土安立，萬姓快樂，皆由此般若波羅蜜。是故付囑諸國王，不付囑比丘、比丘尼、清信男、清信女。何以故？無王力故，故不付囑。汝當受持讀誦，解其義理。」

「大王！吾今所化百億須彌，百億日月，一一須彌有四天下。其南閻浮提有十六大國，五百中國，十千小國。其國土中有七



可難，一切國王爲是難故，講讀般若波羅蜜，七難即滅，七福即生，萬姓安樂，帝王歡喜。」

「云何爲難？日月失度，時節返逆，或赤日出、黑日出，二三四五日出，或日蝕無光，或日輪一重、二三四五重輪現。當變怪時，讀說此經。爲一難也。二十八宿失度，金星、彗星、輪星、鬼星、火星、水星、風星、刀星、南斗、北斗、五鎮大星、一切國主星、三公星、百官星，如是諸星各各變現，亦讀說此經。爲二難也。大火燒國，萬姓燒盡，或鬼火、龍火、天火、山神火、人火、樹木火、賊火，如是變怪，亦讀說此經。爲三

難也。大水澍沒百姓，時節返逆，冬雨夏雪，冬時雷電霹靂，六月雨冰霜雹，雨赤水、黑水、青水，雨土山、石山，雨沙礫石，江河逆流，浮山流石，如是變時，亦讀說此經。爲四難也。大風吹殺萬姓，國土山河樹木一時滅沒，非時大風、黑風、赤風、青風、天風、地風、火風，如是變時，亦讀此經。爲五難也。天地國土亢陽炎火洞燃，百草亢旱，五穀不登，土地赫然，萬姓滅盡，如是變時，亦讀此經。爲六難也。四方賊來侵，國內外賊起，火賊、水賊、風賊、鬼賊，百姓荒亂，刀兵劫起，如是怪時，亦讀此經。爲七難也。」

「大王！是般若波羅蜜，是諸佛菩薩一切衆生心識之神本也，一切國王之父母也。亦名神符，亦名辟鬼珠，亦名如意珠，亦名護國珠，亦名天地鏡，亦名龍寶神王。」

佛告大王：「應作九色幡，長九丈；九色華，高二丈；千支燈，高五丈；九玉箱，九玉巾，亦作七寶案，以經置上。若王行時，常於其前足一百步，是經常放千光明，令千里內，七難不起，罪過不生。若王住時，作七寶帳，中七寶高座，以經卷置上，日日供養，散華燒香，如事父母，如事帝釋。」

「大王！我今五眼明見，三世一切國王皆由過去侍五百佛，得

爲帝王主；是故一切聖人羅漢，而爲來生彼國，作大利益。若王福盡時，一切聖人皆爲捨去。若一切聖人去時，七難必起。」

「大王！若未來世有諸國王護持三寶者，我使五大力菩薩往護其國：一、金剛吼菩薩，手持千寶相輪往護彼國；二、龍王吼菩薩，手持金輪燈往護彼國；三、無畏十力吼菩薩，手持金剛杵往護彼國；四、雷電吼菩薩，手持千寶羅網往護彼國；五、無量力吼菩薩，手持五千劒輪往護彼國。五大士、五千大神王，於汝國中大作利益，當立形像而供養之。」

「大王！吾今三寶付囑汝等一切諸王：憍薩羅國、舍衛國、摩

竭提國、波羅奈國、迦夷羅衛國、鳩尸那國、鳩睺彌國、鳩留國、罽賓國、彌提國、伽羅乾國、乾陀衛國、沙陀國、僧伽陀國、捷拏掘闍國、波提國，如是一切諸國王等皆應受持般若波羅蜜。」

時諸大眾及阿須輪王，聞佛說未來世七可畏，身毛爲豎，呼聲大叫而言：「願不生彼國。」時十六大國王，即以國事付弟，出家修道，觀四大四色勝出相，四大四色不用識空入行相，三十忍初地相，第一義諦九地相。是故大王捨凡夫身，入六住身；捨七報身，入八法身，證一切行般若波羅蜜。十八梵天阿須輪

王，得三乘觀同無生境，復散華供養，空華、法性華、聖人華、順華、無生華、法樂華、金剛華、緣觀中道華、三十七品華，而散佛上及九百億大菩薩衆。其餘一切衆證道迹果，散心空華、心樹華、六波羅蜜華、妙覺華，而散佛上及一切衆。十千菩薩念來世衆生，即證妙覺三昧、圓明三昧、金剛三昧，世諦三昧、眞諦三昧、第一義諦三昧。此三諦三昧是一切三昧王三昧。亦得無量三昧、七財三昧、二十五有三昧、一切行三昧。復有十億菩薩登金剛頂現成正覺。

## 囑累品第八

佛告波斯匿王：「我誠勅汝等，吾滅度後，八十年、八百年、八千年中，無佛、無法、無僧，無信男、無信女時，此經三寶，付囑諸國王四部弟子，受持讀誦解義，爲三界衆生開空慧道，修七賢行、十善行，化一切衆生。後五濁世，比丘、比丘尼四部弟子，天龍八部，一切神王，國王、大臣、太子、王子，自恃高貴，滅破吾法，明作制法，制我弟子比丘、比丘尼：不聽出家、行道，亦復不聽造作佛像形、佛塔形；立統官制衆，安

籍記僧；比丘地立，白衣高坐；兵奴爲比丘；受別請法。知識比丘共爲一心，親善比丘爲作齋會，求福如外道法，都非吾法。當知爾時正法將滅不久。」

「大王！壞亂吾道，是汝等作。自恃威力，制我四部弟子。百姓疾病無不苦難，是破國因緣，說五濁罪窮劫不盡。」

「大王！法末世時，有諸比丘四部弟子，國王大臣多作非法之行，橫與佛法衆僧作大非法，作諸罪過，非法非律，繫縛比丘，如獄囚法。當爾之時，法滅不久。」

「大王！我滅度後，未來世中四部弟子，諸小國王、太子、王



子，乃是住持護三寶者，轉更滅破三寶；如師子身中蟲自食師子，非外道也。多壞我佛法，得大罪過，正教衰薄，民無正行，以漸爲惡，其壽日減，至于百歲。人壞佛教，無復孝子，六親不和，天神不祐，疾疫惡鬼日來侵害，災恠首尾，連禍縱橫，死入地獄、餓鬼、畜生，若出爲人，兵奴果報，如響應聲；如人夜書，火滅字存。三界果報，亦復如是。」

「大王！未來世中，一切國王、太子、王子、四部弟子，橫與佛弟子書記制戒，如白衣法，如兵奴法，若我弟子比丘、比丘尼，立籍爲官所使，都非我弟子，是兵奴法。立統官攝僧典、

主僧籍，大小僧統，共相攝縛，如獄囚法，兵奴之法。當爾之時，佛法不久。」

「大王！未來世中，諸小國王四部弟子，自作此罪破國因緣，身自受之，非佛法僧。大王！未來世中流通此經，七佛法器，十方諸佛常所行道。諸惡比丘，多求名利，於國王太子王子前，自說破佛法因緣，破國因緣。其王不別，信聽此語，橫作法制，不依佛戒，是爲破佛破國因緣。當爾之時，正法不久。」

爾時，十六大國王，聞佛七誠所說未來世事，悲啼涕出，聲動三千，日月、五星、二十八宿，失光不現。時諸王等，各各至

心受持佛語，不制四部弟子出家行道，當如佛教。

爾時，大衆十八梵天王，六欲諸天子歎言：「當爾之時，世間空虛，是無佛世！」爾時，無量大衆中，百億菩薩彌勒、師子月等，百億舍利弗、須菩提等，五百億十八梵王、六欲諸天，三界六道，阿須輪王等，聞佛所說護佛果因緣、護國土因緣，歡喜無量，爲佛作禮，受持般若波羅蜜。

## 佛說仁王般若波羅蜜經卷下

# 讚

般若功德 護國安邦 斑足同化普明王 帝釋慶  
重光 正法隆昌 五方降吉祥  
南無般若會上佛菩薩（三稱）

# 迴向偈

願以此功德	莊嚴佛淨土
上報四重恩	下濟三塗苦
若有見聞者	悉發菩提心
盡此一報身	同生極樂國

# 仁王般若波羅蜜經簡介

又稱《仁王般若波羅蜜護國經》，簡稱《仁王般若經》、《仁王經》。收在《大正藏》第八冊。現存兩種譯本：一題《仁王般若波羅蜜經》，姚秦·鳩摩羅什譯；一題《仁王護國般若波羅蜜多經》，唐·不空譯，略稱仁王護國經、新譯仁王經，文詞與舊經略同。兩種譯本都分上下兩卷，分為八品：(1)〈序品〉(2)〈觀空品〉：唐譯作〈觀如來品〉(3)〈菩薩教化品〉：唐譯作〈菩薩行品〉(4)〈二諦品〉(5)〈護國品〉(6)〈散華品〉：唐譯作〈不思議品〉(7)〈受持品〉：唐譯作〈奉持品〉(8)〈囑累品〉。

本經係佛陀為十六大國王說示守護佛果、護菩薩十地行法門及守護國土之因緣，謂講說受持此經，則可息災得福。與法華經、金光明經並稱護國三部經。修仁王會時，即用此經。

羅什譯本之註疏有《仁王護國般若經疏》五卷（智顗說，灌頂記）、《仁王般若經疏》六卷（吉藏）、《仁王經疏》六卷（圓測）等。不空譯本則有《仁王護國般若波羅蜜多經疏》三卷（良賁）、《仁王經疏》四卷（淨源）等。

本經流行以後，中國歷代王朝常有仁王法會之設，大都依本經〈護國品〉所說儀規建立道場，講誦本經，以圖鎮護國家，祈禳災變。見於記載的，先有陳代武帝於永定三年（559）在內廷設仁王大齋；又後主於至德三年（585）請智顗於太極殿講本經百座，繼續七晝夜燃千燈；唐代太宗於貞觀三年（629）集京城僧尼於龍田寺，每月二七日行道，轉《仁王》等經，以為常例。其後代宗時，不空譯出新譯本，於永泰元年（765）在長安資聖、西明兩寺設百高座，請百法師講誦此經。此種護國法會，在高麗、日本兩國，亦曾相繼仿行。

據唐大興善寺翻經沙門慧靈所撰〈仁王護國經道場念誦儀規序〉，不空大師既重譯經文，復出《仁王念誦儀規》、《念誦法》、《陀羅尼釋》等，授其弟子良賁，詳說十方金剛菩薩身相威德，及有關建立護國法會的擇地設壇、入場、觀想、結印等行法，將此仁王經法，認為是鎮護國家、增長壽命、天下泰平、除滅七難等目標而修的祕法，與請雨經法、孔雀經法、守護經法共稱為四個大法，因此本經與密教儀規發生聯繫，是故唐譯本在入藏錄上常不屬於般若部，而列入祕密部。

摘自【中華佛教百科全書】及【佛光大辭典】